

Gobierno di Aruba a partner cu FCCA

Lo inverti alrededor di 4 miyon florin pa construccion di 19 apartamento pa studiantenan



DIAMARS anochi, Prome Minister Evelyn Wever-Croes tabata presente na e desvelo di e proyecto pa construi “studentenflats”, apartamento pa studiantenan. E apartamentonan aki lo wordo construi na e edificio na unda antes tabata Ministerio Publico, Departamento di Asuntonan Economico, y un tempo Banco Central, pero pa años caba e edificio aki ta bandona. Prome Minister a indica cu desde Gabinete Wever-Croes a drenta Gobierno, a enfoca mas na desaroya centro di ciudad y busca edificionan cu ta di Gobierno y bandona, pa asina duna nan un proposito nobo.

Pa cu e construccion di apartamentonan pa e studiantenan, Gobierno di Aruba a partner cu FCCA, cu a kere den e vision di Gobierno pa revitalisa centro di ciudad. FCCA ta haci un inversion di mas o menos 4 miyon florin pa construi 19 apartamento. E apartamentonan aki ta pa e studiantenan cu ta bin di afo pa studia na Universidad di Aruba, pero tambe pa studiantenan local cu mester di un luga pa biba.

“Mi ta gradici FCCA pa kere den e vision di Gobierno y pa nan “partnership” den haci e proyecto aki realidad. Mi ta spera cu e colaboracion aki, inspira mas partners den sector priva pa yuda den loke ta revitalisacion di centro di ciudad.

Un danki na Minister Geoffrey Wever cu e logro aki, y tambe na Departamento di DIP y DOW cu a traha duro pa haci esaki posibel. Por ultimo mi ta gradici e pueblo en general pa e confianza deposita den nos Gobierno. Na momento cu nos a wordo eligi, pueblo a pidi nos pa saca Aruba di e pandemia y stabilisa e economia, y nos a logra esaki, tambe pueblo a pidi pa yuda nos isla tin progreso y bienestar y esaki ta loke nos ta trahando riba dje. E enfoke aworaki ta pa trece progreso y bienestar den cada rincon di nos pais, e ta nos compromiso y nos lo sigui haci nos maximo esfuerzo pa cumpli cu ne tambe”, Prome Minister a expresa.